

of

Hozirgi kunda
O'zbekistonda:

Mehnatga haq to'lashning eng kam miqdori:
920 000 so'm

Bazaviy hisoblash miqdori:
300 000 so'm

Pensiya hisoblashning bazaviy miqdori:
324 000 so'm

YOSHLAR OVOZI

BIZ – KELAJAK BUNYODKORIMIZ!

Ijtimoiy-siyosiy, iqtisodiy,
adabiy-badiiy
gazeta

58 (16511)
2022-yil, 24-avgust
chorshanba

[/yoshlarovozi](#)

[/yoshlarovozi](#)

[/yoshlarovozi.uz](#)

Gazeta 1925-yildan chiqa boshlagan

Imtiyoz
2-bet

Tadbirkorlar uchun
imkoniyatlar

Besh tashabbus olimpiadasi
5-bet

Arizalar
1 milliondan oshdi

Uchqun
7-bet

Oltin davr
og'riqlari

TALABALAR TURAR JOYI




RO'ZDADA
QOLAYOTGAN
“KELAJAK”

149

MING TALABA
YOTOQXONAGA MUHTOJ

batafsil
3-betda

INKLYUZIV TA'LIM MARKAZI:



JIZZAX TAJRIBASI

ta'lim markazi"ga may, iyun, iyul, avgust oylarida jami 74 nafar ijtimoiy himoyaga muhtoj yoshlar qamrab olindi. Ko'rsatilgan yordamdan so'ng ularning 29 nafari sog'aydi. Hozir markazda 45 nafar bola tahsil olmoqda. Shundan "Logopediya" to'garagida 28 nafar, "Qo'l mehnati" to'garagida 17 nafar bola ishtirok etadi.

"Logopediya" to'garagi (zaif ko'ruvchi, zaif eshituvchi, nutqi-

Azizbek
YO'LDOSHEV,

Yoshlar ishlari agentligining
Jizzax viloyati boshqarmasi
ijtimoiy himoyaga muhtoj
yoshlar bilan ishlash bo'limi
mutaxassisi


Bugungi kunda Jizzax viloyatida nogironligi bo'lgan yoshlar (30 yoshgacha) 10 ming 443 nafarni tashkil qiladi. Ularga bepul va sifatli ta'lim olishi uchun keng imkoniyatlar yaratilmoqda.

Yil boshidagi xatlov va o'rganishlar natijasida 305 nafar nogiron yigit-qiz "Yoshlar daftari"ga kiritilib, 251 nafariga amaliy yordam ko'rsatildi. Bugungi kunga qadar bu yoshlarga asbob-uskuna va mehnat qurollari, davolanish xarajatlari, moddiy yordam va kontrakt pullari uchun 654,4 million so'm to'lab berildi.

Imkoniyati cheklangan yoshlarni nafaqat ijtimoiy himoya qilish, balki ularning shaxsiy rivojlanishi va ta'lim olishi borasida ham chora-tadbirlar ishlab chiqilmoqda. Mamlakatimizda alohida yordamga muhtoj bolalarning rivojlanish darajasi, imkoniyatlari va qobiliyatiga ko'ra maxsus yoki umumiy ta'lim tizimida o'qishi uchun inklyuziv ta'lim markazi tizimi amalga oshirilmoqda.

Inklyuziv ta'lim vazifasi bolalarning qobiliyati va holatidan qat'i nazar, ularning barchasiga sifatli ta'lim berishdan iborat. Inklyuzivlik bunday bolalar ijobiy ruhiy va ijtimoiy rivojlanishi uchun oilada yashashi va o'z tengdoshlari bilan oddiy maktabda bilim olishi lozimligini nazarda tutadi. Inklyuziv ta'lim tizimi nogironlar aravachasidagi bola yaqin atrofda joylashgan har qanday maktabda ta'lim olishi, o'zlashtirishda qiynalayotgan bo'lsa, o'qish va yozishga o'rganish uchun maxsus yordamga ega bo'lishi, darslarga qatnamay qo'ygan bolaga esa maktabga qaytish uchun tegishli yordam ko'rsatilishini kafolatlaydi.

Bu borada Yoshlar ishlari agentligining Jizzax viloyati boshqarmasi qoshida tashkil etilgan "Inklyuziv



da kamchiligi mavjud, rotatizm) o'quvchilariga yakka tartibda va frontal yondashgan holda turli mashg'ulotlar o'tilyapti.

Masalan, nutq nuqsoniga ega bo'lgan o'quvchilar bilan logopedik mashg'ulot, zaif ko'ruvchi o'quvchilar bilan sezuvchanlikni oshirish mashqlari, zaif eshituvchi o'quvchilar bilan imo-ishora mashqlari, frontal tarzda esa diqqat-e'tiborni jamlash, xotira va fikrni to'liq ifodalash didaktik o'yinlari o'tkazilyapti. "Qo'l mehnati" to'garagida ham shu

tartibda mashg'ulotlar olib borilmoqda.

Nogiron yoshlarni har tomonlama qo'llab-quvvatlash maqsadida joriy yil 8-16-avgust kunlari Jizzax viloyati hokimligi hamda qator mutasaddi tashkilotlar bilan hamkorlikda 100 nafar ijtimoiy himoyaga muhtoj yosh Forish tumani "Koinot" oromgohiga dam olish uchun yuborildi. Oromgohda ikkita fitobar, axborot-resurs markazi, ma'naviyat va ma'rifat xonasi, mashg'ulot zallari tashkil etilib, ingliz tili, tasviriy san'at, mohir qo'llar, kompyuter savodxonligi kabi o'n beshga yaqin to'garakda malakali murabbiylar mashg'ulot olib bordi. Tibbiyot bo'limida fizioterapiya muolajalari, fitodavolash xizmatlari, jismoniy tarbiya mashqlari tashkil etildi.

Imtiyoz

TADBIRKORLAR UCHUN IMKONIYATLAR

Davlatimiz rahbari 22-avgust kuni tadbirkorlar bilan ochiq muloqot o'tkazib, soha vakillarini qo'llab-quvvatlash yuzasidan 5 ta yo'nalishda tashabbuslarni ilgari surdi.

BIRINCHI YO'NALISH – korxonalarni toifalarga ajratib, qo'llab-quvvatlash bo'yicha alohida yondashuv belgilanadi. Bunda korxonalar yillik ayatlanmasi bo'yicha toifalarga ajratiladi:

- 1 milliard so'mgacha bo'lgani – **mikro biznes**;
- 10 milliard so'mgacha bo'lgani – **kichik biznes**;
- 100 milliard so'mgacha bo'lgani **o'rta biznes** toifasiga kiradi.

2023-yil 1-yanvardan mikro biznes uchun aylanmadan olinadigan soliqning amaldagi 4 foizdan 25 foizgacha bo'lgan stavkalari o'rniga **yagona 4 foizli soliq stavkasi joriy etiladi**. Bunda olis hududlardagi va alohida toifadagi tadbirkorlar uchun amaldagi 1 va 2 foizli stavkalar saqlab qolinadi. Yoki ular ixtiyoriy ravishda yiliga 20-30 million so'm to'lasa, buxgalteriya hisobini yuritish va soliq idoralarga taqdim etish majburiyatidan ozod etiladi.

Aylanmasi 1 milliard so'mdan oshib, umumiy soliq to'lash tartibiga o'tgan korxonalar bir yil davomida foyda solig'ini 2 barobar kam to'laydi.

**2023-yil 1-yanvardan:**

- kichikdan o'rta biznesga o'tgan korxonalar ikki yil davomida foyda solig'ining faqat 50 foizini to'laydi;
- mulkni sug'urta qilish xarajatlarining 50 foizi davlat hisobidan qoplab beriladi;
- soddalashtirilgan soliq, moliyaviy va statistika hisobotlari joriy etiladi;
- davlat xaridlarida 20 foiz kvota o'rnatilib, ushbu xaridlar doirasida ularga oldindan 50 foiz mablag' to'lab beriladi (amalda 15 foiz).

Qo'shilgan qiymat solig'i stavkasi **15 foizdan 12 foizga tushiriladi**.

IKKINCHI YO'NALISH – tadbirkorlar faoliyatini kengaytirish, yangi loyihalarni amalga oshirish uchun qulay moliyalashtirish tizimini yaratishdir. Bu borada kichik biznes loyihalariga 20 trillion so'm yo'naltiriladi.

UCHINCHI YO'NALISH – biznes yurib ketishi uchun yetarli shart-sharoit, infratuzilma va kafolatlil bozor kerak. Shu sababli, eng avvalo, tuman va shaharlarning sharoitidan kelib chiqib biznes uchun **alohida yondashuvlar joriy etiladi**.

TO'RTINCHI YO'NALISH – tadbirkorlarning mulk huquqini himoya qilish masalasi. Bundan buyon yer va mulk ajratish haqidagi qarorlar **faqat sud tartibida bekor qilinadi**.

BESHINCHI YO'NALISH – tadbirkorlarga nisbatan yangi javobgarlik va jazo choralarini joriy etishga **3 yillik moratoriy e'lon qilinadi**. Shuningdek, tadbirkorlarga nisbatan majburiyatlar yuklaydigan yangi qonun hujjatlari qabul qilinganda, yo'l qo'ygan xatosi uchun tadbirkorga **6 oy davomida jazo qo'llanilmaydi**.

KO'CHADA QOLAYOTGAN "KELAJAK"

/Birinci maqola/

Test natijalari chiqishiga oz vaqt qoldi. Hamdemay o'n minglab yoshlar talabalik baxtiga muayassar bo'ladi. Afsuski, o'qish uchun boshqa shaharlarga otlangan yoshlarni katta sinov va g'ovlar kutib turibdi. Ularning eng kattasi boshpana masalasidir.

Shaharda hech kim talabalarni quchoq ochib kutib turgani yo'q. Yotoqxonalarda joy yetishmasligi, ijarama-ijara sargardonlik qismati ularni bir zum tinch qo'ymaydi.

Xo'sh, poytaxt talabalarni kutib olishga tayyormi?

149

MING TALABA YOTOQXONAGA MUHTOJ

2020/2021-o'quv yili boshida respublika-mizdagi oliy ta'lim muassasalari 127 tani tashkil etgan. Ularning 88 tasida talabalar uchun yotoqxonalar mavjud bo'lib, 58 ming talabani sig'dira oladi. Vaholanki, har yili 149 ming nafardan ziyod talabaning yotoqxonaga ehtiyoji bor. So'nggi yillarda oliy ta'lim muassasalarida qabul kvotasi 2,6 barobarga, talabalar soni esa 2,3 barobarga ko'paydi. Lekin **yotoqxonalarda o'rin soni atigi 25 foizga oshgan.**

Mahalliy OTMlarning asosiy qismi, shuningdek, xorijiy universitetlarning ko'plab filiallari Toshkent shahrida joylashgan. Samarqand, Andijon, Burxoro, Qarshi shaharlari talabalar soni bo'yicha keyingi o'rinlarni egallaydi. Biroq talabalarni turar joy bilan ta'minlash ko'rsatkichlari juda past. 2021-yil holatiga ko'ra, mamlakatning **nufuzli 6 o'quv yurtidagi jami talabalar soniga nisbatan TTJ bilan ta'minlanganlar soniga e'tibor qarataylik:** Mirzo Ulug'bek nomidagi O'zbekiston Milliy universiteti talabalari 29 769 nafarni tashkil qilgan. Ularning bor-yo'g'i 12,2 foizi talabalar turar joyi bilan ta'minlangan, xolos.

4703 nafar talaba tahsil olayotgan Toshkent davlat yuridik universiteti talabalar turar joyida 503 nafar (10,6 foiz) talaba yashashi uchun sharoit yaratilgan. Toshkent davlat sharqshunoslik universitetida 2700 nafarga yaqin talaba tahsil olsa, ularning 8 foizi - 220 nafari yotoqxonaga bilan ta'minlangan. Qarshi davlat universitetida jami talabalar soni 16 578 nafar, 1084 nafari talaba turar joyiga ega.

Samarqand davlat universitetida o'qiyotgan 16 294 nafar talabadan 8 foizi, ya'ni 1470 nafari turar joy bilan ta'minlangan. 7200 nafar talaba ijara uyda turadi.

Bu ko'rsatkich xorijiy OTM filiallarida ham yuqori emas. Toshkent shahridagi Xalqaro Vestminster universitetida 3803 talabadan 180 nafari, Gubkin nomidagi Rossiya davlat neft va gaz universitetida 1000 talabadan 460 nafari, Toshkent shahridagi Inha universitetida 1500 talabadan 200 nafari, Toshkent shahridagi Singapur menejmentni rivojlantirish institutida 740 talabadan 180 nafari, Ajou universitetida 450 talabadan 196 nafari yotoqxonaga bilan ta'minlangan.

Yotoqxonalarini ko'proq birinchi bosqich talabalariga ajratish, nafaqat magistrantlar, balki 3 va 4-bosqich talabalariga ham joy bermaslik holatlari uchraydi. OTMlar kam ta'minlangan, boquvchisini yo'qotgan, "Temir daftar"da ro'y-xatda turuvchilarni turar joy bilan ta'minlashga e'tibor qaratmoqda. Bundan ortig'iga qodir emas.



Shahrufa SATTOROVA,
"Yoshlar ovozi" muxbiri

PREZIDENT TOPSHIRIG'I QACHON BAJARILADI?

Prezidentimiz 2021-yil iyun oyida oliy ta'lim tizimidagi ustuvor vazifalar muhokamasiga bag'ishlab o'tkazilgan selektorda talabalarning yotoqxonaga muammosiga to'xtalgandi. Davlatimiz rahbari talabalar uchun qo'shimcha 149 mingta turar joyga ehtiyoj borligi va bu masalani tadbirkorlar bilan xususiy sherikchilik orqali tezda hal qilish mumkinligini aytgandi.

Shundan so'ng, 2021-yil sentabrida qabul qilingan hukumat qarori bilan respublika bo'yicha davlat-xususiy sherikchilik asosida har biri o'rtacha 400 o'rinli, jami **228 ta talabalar turar joylari barpo etilishi belgilandi.** 2022-yilda hududlarda 47 ta, 2023-yilda 67 ta, 2024-yilda 62 ta, 2025-yilda 52 ta yotoqxonaga qurilishi kerak edi. Biroq...

Qaror ijrosi bilan qiziqib, **Oliy va o'rta maxsus ta'lim vazirligi matbuot xizmatiga murojaat qildik.** Vazirlikning ma'lum qilishicha, talabalar turar joylarini DXS asosida barpo etish bo'yicha 2022-yilda 43 ta OTMda 18 800 o'rinli 47 ta talabalar turar joyini barpo etish belgilangan. 2022-yil 1-avgust holatiga ko'ra, umumiy quvvati 20 800 o'rinli 39 ta loyiha ustida ishlar olib borildi. Shundan, **350 o'rinli 1 ta loyiha foydalanishga topshirilgan,** 4800 o'rinli 11 ta loyiha davlat reyestriga olingan, 3000 o'rinli 7 ta loyiha bitimi rasmiylashtirish bosqichida, 1 ta 1 000 o'rinli loyiha tender bosqichida, 3300 o'rinli 5 ta loyiha 45 kunlik e'loniga joylashtirilgan. Shu kunlarda 14 ta 8 350 o'rinli loyiha yuzasidan konsepsiya hujjatlari ishlab chiqilmoqda.

Ta'kidlashlaricha, qurilish xarajatlari teng ulushlarda davlat oliy ta'lim muassasasi va O'zbekiston Respublikasining davlat byudjeti mablag'lari hisobidan amalga oshiriladigan talabalar turar joylari va OTMning to'liq o'z mablag'lari hisobidan hamda Investitsiya dasturi doirasida 10 090 o'rinli 21 ta loyiha amalga oshirilmoqda. Shundan 1 ta 550 o'rinli loyiha foydalanishga topshirilgan. Tender bosqichidagi loyihalar 1 ta 240 o'rinli, loyiha-smeta hujjatlari ishlab chiqilayotgan loyihalar 11 ta 4 850 o'rinli. Bugungi kunda 30 ta 16 050 o'rinli loyihada qurilish ishlari jadal olib borilmoqda.

REJA 4% BAJARILGAN

Yil yakuniga ham 4 oy qoldi, talabalar yotoqxonalarini qurish rejasiga esa deyarli bajarilmadi. **Oliy va o'rta maxsus ta'lim vazirligi taqdim etgan ma'lumotlarga ko'ra,** bugungi kunda 2 ta OTM - Nukus va Samarqand davlat universitetlarida yotoqxonalar qurilib, foydalanishga topshirilgan. Bu **2022-yilgi reja hozircha 4 foizga bajarilganini ko'rsatadi.** Yotoqxonalarini qurish uchun tadbirkorlarga subsidiyalar ajratilganiga qaramay, jarayon

sekin ketmoqda. Talabalar kontingenti eng katta bo'lgan **Toshkent shahrida esa bu boradagi ishlar deyarli boshlanmagan.** Faqat O'zbekiston davlat jahon tillari universitetida tadbirkor 1 200 o'rinli yotoqxonaga qurmoqda. Rejaga kiritilgan boshqa 9 ta universitet bo'yicha esa hali mavhumlik bor.

Yildan yilga qabul kvotalari oshirilayotgani yaxshi, albatta. Biroq OTMlarning moddiy-texnik bazasi va yotoqxonaga infratuzilmasi inobatga olinmayapti. Keyingi yillarda yurtimizda o'nlab xususiy va xorijiy OTMlar faoliyat boshladi, afsuski, ularning hech biriga yotoqxonaga infratuzilmasi bo'yicha talab qo'yilmadi. 90 foiz xususiy va xorijiy OTMlarning yotoqxonasi yo'q. Oshirilgan kvotalar bo'yicha talabalarning turar joylarini esa faqat ijara uylar qondiryapti. Shu bois qarorlar kompleks va oqibatli puxta o'ylab qabul qilinishi lozim.

“

YOTOQXONALARNI KO'PROQ
BIRINCHI BOSQICH TALABALARIGA AJRATISH, NAFAQAT
MAGISTRANTLAR, BALKI 3 VA
4-BOSQICH TALABALARIGA
HAM JOY BERMASLIK
HOLATLARI
UCHRAYDI.

QANDAY YETAKCHILAR SALOHIYATLI KADRLAR REZERVIGA OLINADI?

Joriy yilning 4-avgust kuni Prezidentimiz raisligida davlat xizmatini isloh qilish va boshqaruvda natijadorlikni oshirish chora-tadbirlari yuzasidan o'tkazilgan videoselektor yig'ilishida mamlakatimiz rahbari "Kuni kecha yarim yil yakuni bo'yicha yaxshi natija ko'rsatgan 65 nafar hokim yordamchisi va 40 nafar yoshlar yetakchilarini Salohiyatli kadrlar rezerviga o'z zim tanlab oldim", deya aytgan edi. Xo'sh, bu ishonch kimlarga berildi?



Ilk qahramonimiz Shayxontohur tumanidagi "Sarhumdon" mahallasi yoshlar yetakchisi. Uning fikricha, mahalladagi yoshlarning bandligini ta'minlash, ularga imtiyozlar berish orqali yoshlar orasida jinoyatchilikning oldini olish, ularni egri yo'llardan qaytarish mumkin.



Davronbek MELIYO'ZIYEV,
Shayxontohur tumanidagi "Sarhumdon"
mahallasi yoshlar yetakchisi:

— Dastlabki ishimni probatsiya ro'yxatida turuvchi, jinoyatchilikka moyilligi bor, notinch-noqobil oila farzandlari hamda bemaqsad yurgan ishsiz yoshlar bilan yaqindan tanishib, ular bilan do'stona munosabatda bo'lishdan boshladim. "Besh tashabbus olimpiadasi" doirasida tashkil etilgan barcha musobaqalarga aynan shu toifadagi yoshlarni qamrab oldik. Hatto mahalla sardorlari ham shu yoshlardan saylandi.

Xalqaro islom akademiyasi bilan hamkorlikda 20 nafar yoshga chet tillarni bepul o'rgatishni yo'lga qo'ydik. Ichki ishlar vazirligi "Jar" sport sog'lomlashtirish kompleksi rahbariyati bilan 35 nafar ijtimoiy himoyaga muhtoj yoshlarga boks, taekvondo, tennis, gimnastika to'garaklarida bepul shug'ullanishlari uchun yo'llanmalar berildi. Yana 29 nafar ijtimoiy himoyaga muhtoj yoshlarga tumanimizdagi sport maktabining suzish to'garagiga bepul qatnashish imkoniyati taqdim etildi.

Shuningdek, O'zbekiston JUDO federatsiyasi bilan hamkorlikda 10 nafar yosh bepul to'garaklarga jalb etildi. Mazkur yo'llanmalarni mahalladagi sportga qiziqishi baland hamda vaqtincha



ishsiz, jinoyatchilikka moyilligi bor yoshlarga taqdim etdik.

Mahallamiz yoshlari orasida iqtidorlilari ham talaygina. Masalan, 41-maktab bitiruvchisi Robiya Akromova "FOUNDERS" o'quv markazida ingliz tilidan dars bermoqda. Mahallamiz yoshlarining ingliz tilini bepul o'rganishi uchun Robiyaga mahallamiz binosidan bir xonani ajratib berdik. Robiya bu yerda mahalla yoshlariga bepul dars bermoqda. Hozir mahallamizdan tashqaridagi yoshlar ham to'lov asosida Robiyadan ta'lim olish istagini bildirmoqda. Robiya o'z mahallaodoshlariga yordam berish bilan birga yaxshigina daromad ham olyapti.

Ayni paytda mahallamda ishsiz yosh yo'q. Shu paytga qadar yoshlar orasida birorta ham jinoyat sodir bo'lmadi.




Laylo MEN'IO'RAYEVA,
Termiz shahridagi "Bog'zor" mahallasi yoshlar yetakchisi:

— O'z vazifamga kirishgan kunimdanoq, mahallamiz yoshlarining orzu-umidlari quloq tutdim. Ular orasida 12 nafar yosh dizaynerlikka qiziqishini, o'zlari yaratgan milliy va zamonaviy liboslarini keng jamoatchilikka namoyish qilish istagini bildirdi. Yoshlar bilan mazkur loyihani yanada kengaytirib, dastur ishlab chiqdik.

Tashabbusimiz hokimimizga ham ma'qul kelib, bizni qo'llab-quvvatlaydigan bo'ldi. Yoshlar ishlari agentligi Termiz shahar bo'limi, Termiz shahar madaniyat bo'limi, Milliy gvardiya Surxondaryo viloyati boshqarmasi, DXX Surxondaryo viloyati boshqarmasi, Termiz shahar hokimligi, Termiz shahar xalq ta'limi bo'limi bizga yordam berishga shay. Quvonarlisi, ushbu loyiha nafaqat Termiz shahri, balki Surxondaryo viloyati bo'yicha ilk marotaba o'tkazilayotgan edi. Viloyat miqyosida shov-shuvlarga sabab bo'lgan ko'rgazmamiz Termiz shahridagi San'at saroyi yozgi sahnasida ko'tarinki ruhdan bo'lib o'tdi.

Shundan so'ng mahallamizda yosh dizaynerlarimizning safi kengaydi. Keyinchalik ular orasidan ikki nafar havaskor dizaynerlar — Gulzoda Abdunabiyeva, Aziza Xatamova Xalqaro modalar namoyishida o'zlarining dizaynerlik ishlari bilan ishtirok etishdi.



Qahramonlarimizning har biri o'zlariga yuklatilgan asosiy vazifalar — yoshlar bandligini ta'minlash, bo'sh vaqtini mazmunli tashkil etish, sportga bo'lgan qiziqishlarini rivojlantirish, ishsiz yoshlarga subsidiya asosida ish qurollari ajratish, tadbirkor qilish, boringki, har sohada eng yaxshi natijalarni ko'rsata olgan yoshlar yetakchilari hisoblanadi. Ular o'zlarining tashabbusi, yangicha loyihalari bilan mahalladagi muammolarni bartaraf etmoqda. Hatto galdagi qahramonimiz kabi ajrim yoqasiga kelib qolgan yosh oilalari bu yo'ldan qaytarmoqda.

Suraj ALIYEV,
Ellikqal'a tumanidagi "Navoiy"
mahallasi yoshlar yetakchisi:



— Yaqinda mahallamiz raisidan yosh oilalardan biri — Eshchanovlarning tinimsiz janjalidan xabar topib, o'sha xonadonga yo'l oldim. Janjalning asosiy sababini so'radim. Aytishlaricha, er-xotin hech qayerda ishlamas, ro'zj'orni faqat bolalar nafaqasidan qilishar ekan. Yuzaga kelgan yetishmovchilik esa doimiy janjalga

sabab bo'layotgan ekan. Yorqinoy Yaqubova bilan suhbatlashib, qo'ldan qanday ish kelishini so'raganimda shirinliklar pishirishga uquvi borligini aytdi. Mikroto'lqinli pechi yo'qligini, agar bo'lganida shirinliklar tayyorlab, savdoga chiqarish istagi borligini bildirdi. Uning istagini amalga oshirish uchun "Yoshlar daftari"ga



ro'yxatga olib, barcha zarur jihozlarni olib berdik. Mahalla ahlining homiyligi asosida kerakli mahsulotlarni ham ajratdik. Yorqinoy o'z hovlisidan bir xonani shirinliklar sexiga aylantirdi. Hozir tumanimiz do'konlariga shirinliklaridan yetkazib, daromad olmoqda. Oilasi ham xotirjam. Endi xonadon egasi G'ulomning doimiy ish o'miga ega bo'lishi uchun harakat qilyapmiz.

Mahallamizda sog'lig'ida muammasi bor yoshlarga ham alohida e'tibor berib kelyapman. 2001-yilda tug'ilgan Allashukur Alimboyev sog'lig'i sabab ishlash imkonini cheklangan yoshlardan. Oilasida undan boshqa boquvchi yo'q. Onasining ham sog'lig'ida muammasi borligi bois hech qayerda ishlamaydi. Allashukur 3 yildan buyon disk churasini kasalligidan aziyat chekyapti, chet davlatga ishlashga ketgan otasidan esa 8 yildirki, hech qanday darak yo'q. Onasiga nima yordam bersak, ko'nglingiz xotirjam bo'ladi, deb savol berganimda faqat davolanish uchun moddiy yordam zarurligini, o'g'li sog'lig'ini tiklab olsa, qo'ldan juda ko'p ish kelishini aytdi. Shu kunning o'zida Allashukurni "Yoshlar daftari"ga ro'yxatga oldim va salomatligini tiklashi uchun zarur mablag' ajratildi. Hozir Allashukurning ahvoli yaxshi, ishga chiqib oilasini boqmoqda.

Suraj mahallasidagi yoshlarning san'atga qiziqishlariga ham alohida e'tibor qaratmoqda. Shu boisdan mahalla yoshlari "Yoshlar ovozi" ko'rik-tanlovida faxrli o'rnlarni qo'lga kiritgan.

Bu yetakchilar har sohada tashabbus ko'rsatmoqda. Har holda ularning 10 mingga yaqin yetakchilar orasidan saralab olingani bejiz emas. Keyingi sonlarimizda ham shunday ilg'or yoshlar yetakchilarining faoliyati bilan tanishtirishda davom etamiz.

Iqbol PARDAYEVA,

"Yoshlar ovozi" muxbiri

ORZUM USHALDI



Otabek QOBILOV,

Respublika yosh ijodkorlar seminarining badiiy publitsistika yo'nalishi ishtirokchisi, Chust tumanidagi "Tinchlik" mahallasi yoshlar yetakchisi

Yodingizda bo'lsa, ijodga juda qiziqadigan, mahalla yoshlarini ham o'z ortidan yetaklayotgan mahalla yoshlar yetakchisi haqida maqola e'lon qilgan edik. Chust tumanidagi "Tinchlik" mahallasi yoshlariga yetakchilik qilayotgan Otabek Qobilovning eng katta orzularidan biri – Respublika yosh ijodkorlar seminarida qatnashish edi. Buni qarangi, yaqinda uning orzusi ro'yobga chiqdi. Mazkur seminar taassurotlari haqida uning o'zidan eshitsak.

– 2022-yil 17-avgust. Poytaxtimizdagi Adiblar xiyoboni respublika yosh ijodkorlarining an'anaviy seminarini ishtirokchilarini qarshi oldi. Unda o'zbek adabiyotining zabardast ijodkorlari, O'zbekiston Yozuvchilar uyushmasi va viloyat bo'limlarining vakillari, hududlardan saralab olingan iste'dodlar qatnashdi.

Dastlab xiyobondagi Alisher Navoiy haykali poyiga gulchambar qo'ydik. Shundan so'ng Yozuvchilar uyushmasi raisi o'rinbosari Botirjon Ergashev 85 nafar ishtirokchining ijod namunalari o'rin olgan "Eng gullagan yoshlik chog'imda..." nomli bayoz nashrdan chiqqani, kitob barchaga tuhfa etilishini e'lon qildi. Taqdimotda O'zbekiston Qahramoni Ibrohim G'afurov, O'zbekiston xalq shoiri Mahmud Toir, O'zbekiston xalq yozuvchisi Isajon Sulton, Qoraqalpog'iston Yozuvchilar uyushmasi raisi Kengesboy Karimov, Yozuvchilar uyushmasining Sirdaryo viloyati bo'limi rahbari Hayotxon Ortiqboeva so'zga chiqib, yangi to'plam yoshlar uchun katta sovg'a va adabiyot dunyosida yurak dardi va so'z sehiri eng katta kuch ekanini ta'kidladi. Adabiyot olamiga o'z so'zi, iqtidori bilan kirib kelayotgan yoshlarga oq yo'l tiladi.

Shundan so'ng O'zbekiston Yozuvchilar uyushmasi Do'rmon ijod uyida respublika yosh ijodkorlari an'anaviy seminarining ochilish marosimi boshlandi. Tadbirda uyushma a'zolari Mahmud Toir, Ahmadjon Meliboyev, Suvon Meli, Salim Ashur, Kavsar Turdiyeva, Sirojiddin Rauf, Nurboy Jabborov, Xosiyat Rustamova, Farog'at Xudoyqulova va boshqa ijodkorlar mahorat darslari o'tdi.



Respublika yosh ijodkorlarining an'anaviy seminarini uchinchi kuni Parkent ijod uyida o'z ishini davom ettirdi. Bu yerda 2021-yilda o'tkazilgan Zomin seminarida "Birinchi kitobim" loyihasiga tavsiya etilgan 25 nafar yoshning ilk kitobi taqdimoti bo'lib o'tdi. Shundan so'ng ishtirokchilarga O'zbekiston Yozuvchilar uyushmasi va Toshkent viloyatining pul mukofotlari, statuetka, noutbuk, kitoblar jamlanmasi va boshqa esdalik sovg'alari topshirildi. Seminar o'z ishini yakunladi.

Uch kunlik taassurotlarimning, quvonchimning cheki yo'q. Kechagina Ibrohim G'afurov, Mahmud Toir, Abdusaid Ko'chimov, Ahmadjon Meliboyev, Salim Ashur, Mamatqul Hazratqulov kabi ustoz ijodkorlar bilan ko'rishish, ular bilan suhbatda bo'lish orzu edi. Bugun shu ezgu istaklarim ro'yobga chiqdi. Ustozlar sabog'i, mehrga yo'g'rilgan mushoiralar, yangi-yangi do'stlar, go'zal manzara hamda ijod bog'i bag'ridagi unutilmas kunlar hech qachon yodimdan chiqmaydi.

Besh tashabbus olimpiadasi

ARIZALAR 1 MILLIONDAN OSHDI

"Besh tashabbus olimpiadasi"ning 2-mavsumi doirasida mahalla yoshlari madaniyat, san'at, sport, kitobxonlik, axborot texnologiyalari yo'nalishlari bo'yicha 10 dan ortiq tanlov va musobaqalarda ishtirok etishi mumkin. Bu haqda olimpiadaning 2-mavsumi doirasida o'tkazilgan matbuot anjumanida aytib o'tildi. Olimpiadaga yoshlarning taklif

va tashabbuslari asosida milliy kurash bo'yicha musobaqa, "Yoshlar raqs festivali", Milliy va zamonaviy cholg'u ijrochiligi" respublika tanlovlari ham kiritildi.

Musobaqalarda ishtirok etish, shartlari yuzasidan yoshlarga to'liqroq ma'lumot berish maqsadida Yoshlar ishlari agentligining YouTube platformasiga video-qo'llanmalar joylashtirilib, keng

yoritilmoqda. Bugungi kunga qadar musobaqalarda ishtirok etish uchun **1 million nafardan ziyod yosh ro'yxatdan o'tdi.**

"Besh tashabbus olimpiadasi"ning 2-mavsumiga arizalar **9-sentabrga qadar qabul qilinadi.**

Muhammadshukur MUHAMMADJONOV,
"Yoshlar ovozi" muxbiri



XORIJ VA BIZ: YOSHLAR O'RTASIDAGI FARQ KATTA...(MI?)

Ziyoda RAHIMBOYEVA,
"Yoshlar ovozi" muxbiri


Har qanday zamon va makonda taraqqiyot yoshlarning bilim darajasi, salohiyati va dunyoqarashiga qarab belgilanadi. Bugun yoshlar dunyoqarashi tobora o'zgarib, rivojlanib borayotgani hech kimga sir emas.

Ammo ijtimoiy muhit, yashash joyi va shu kabi ayrim jihatlarda yoshlar o'rtasida katta farq borligini ko'rsatadi.

MUSTAQILLIK

Yevropa davlatlarida ota-onalar farzandlarini mustaqil hayotga ancha ertaroq tayyorlay boshlaydi va "uchirma" qiladi. Bizda bunga qisman o'xshash bosqich o'g'il-qizlar maktabni tamomlash davriga to'g'ri keladi. Bu vaqtda yoshlar oldida ta'limni oliy o'quv yurtida davom ettirish yoki hunar o'rganish tanlovi bo'ladi. Bu jarayonga katta hayotga qadam sifatida qaraladi.

Chet elda-chi? 18 yoshni qarshilagan farzandda pul topish va uni to'g'ri sarflay olish ko'nikmasi shakllangan bo'ladi. Bu vaqtda ular oliy ta'lim olish, qaysidir oliy ta'limning "qizil" diplomini qo'lga kiritishni emas, ko'proq o'z ustida ishlash va sayohat qilish rejasini belgilab oladi. Balki, ovqatlanish joylarida ofitsiantlik qilishiga to'g'ri kelar yoki xuddi kinolardagidek gazeta tarqatishar – o'z mehnati orqali maqsadlariga yetishishi mumkinligi go'daklik paytidanoq ongiga singdirib kelingan bo'ladi. Yoshlar mustaqil hayotga qancha erta qadam tashlasa, maqsadiga o'z kuchi bilan erishishi mumkinligini qancha avvalroq anglab yetsa, shuncha yaxshi, nazarimizda!



Birga o'qiyamiz!

Loyiha muallifi Ziyoda RAHIMBOYEVA.

KITOBXONLIK

Amerika maktablarida qaysi fan o'qituvchisi bo'lishidan qat'i nazar – u xoh matematika, xoh jismoniy tarbiya bo'lsin, o'qituvchi o'z o'quvchilarini doimiy mutolaaga chorlab turishi, qiziqtirish o'riniga aylangan.

O'zbekistonda ham targ'ibot ishlari, kitobxonlikni rivojlantirishga e'tibor beqiyos darajada. Yevropa mamlakatlarida bola hali o'qishni o'rganmasidanoq bir nechta kitoblar haqida tasavvurga ega bo'ladi, ajdodlari qoldirgan shoh asarlar xazinasi bilan farzandini tanishtirish, o'qib berish va o'qishga undash ota-onalar uchun muqaddas vazifa. O'zimizda esa mutolaa borasida gap ketar ekan, "Kitob o'qigan "Spark" minadi!" degan qarash shakllanib ulgurgan. Bunda "Yosh kitobxon", "Yosh kitobxon oila" kabi tanlovlar kutilganidan yaxshiroq natija ko'rsatadi. Ammo... kitob o'qish inson ma'naviyati va bilim doirasini boyitib, "Spark"dan ham yaxshiroq sovg'alarga taqdim etishi mumkinligini o'mak ko'rsatish usuli orqali targ'ib qilsak, nur ustiga nur bo'lar edi!

“

MAKTABLAR,
KOLLEJ-
LITSEYLARDA
O'QUVCHIGA
TELEFON ISHLATISH
QAT'IY TAQIQLANIB,
TURLI QOIDALAR
JORIY ETILADI.
AMMO UNDA
TO'G'RI VA O'RINLI
FOYDALANISH
HAQIDA
TUSHUNCHA
BERILMAYDI.



KIYINISH

Brend darajasidagi kiyim-kechaklar, qimmat telefon, turli qo'shimcha texnikalar ham shular jumlasidan. Amerikaning aksariyat maktablarida o'quvchilardan maktab formasida bo'lish talab etilmaydi. Butun e'tibor ularning uzluksiz va sifatli ta'lim olishiga qaratiladi.

Bolalikdanoq kamtar kiyinish, boshqalardan qimmatbaho kiyimi emas, ko'p tilni bilishi, keng dunyoqarashi bilan ajralib turish kerakligi uqtiriladi. Va bu juda yaxshi natija beradi. Asosan, 15-25 yoshdagi o'spirin hamda o'smirlar qimmatbaho buyumlarga faqat to'liq imkoniyatga ega bo'lgandan keyingina qiziqish kerak deb hisoblaydi.

O'zbekiston sharoitida esa maktab o'quvchilari o'rtasida 5-7-sinflik vaqtidanoq telefon va ijtimoiy tarmoqlarga kuchli qiziqish paydo bo'la boshlaydi. Kamdan-kam hollarda bu qiziqish ularning ta'lim olishi uchun ijobiy ta'sir ko'rsatishi mumkin. Nega deysizmi, chunki maktablar, ayrim hollarda kollej-litseylarda o'quvchiga telefon ishlatish qat'iy taqiqlanib, turli qoidalar joriy etiladi. Ammo undan to'g'ri va o'rinli foydalanish haqida tushuncha berilmaydi. Bundan kelib chiqadigan tushunmovchiliklar qanday oqibatlariga olib borishi mumkinligi ko'pchilikka yaxshi ma'lum.

Yuqoridagi bir nechta farqli jihatlarni sanaganimizdan ham ko'rinib turibdiki, ko'pchilik oshiqadigan va "Orzular shahri" deb hisoblaydigan o'sha Amerikada ham xuddi bizga o'xshash yoshlar yashaydi. Ularning kelajakda yuqori natijalarni ko'rsatadigan sportchi, dunyo tan olgan milliarder yoki taniqli yozuvchi bo'lib yetishishida aynan Amerikada tug'ilganligi emas, o'z oldiga qo'ygan maqsadlari muhim rol o'ynaydi.



Kitobxon yoshlarimizning sevimli loyihasi – "Birga o'qiyamiz"ning 6-soni g'olibi **Saburova Komilaxon Erkinboy qizi**. Ayni imtihon pallasida abituriyentlik tashvishlaridan ortib, kitobxonlikka ham vaqt ajratgan Komilaxonni yutuq bilan muborakbod etamiz.

Shu bilan birga, faol ishtirokchilar – **Husnidabonu Hazratqulova, Muxlisa Egamberdiyeva, Zarnigor Xalil qizi, Husan Majidov va Alijon Bekmurodovga** tashakkur aytamiz. Qisqa vaqt ichida "Jadidlar" to'plamini o'qishga va chuqur tahlil qilishga ulgurgan ilmga chanqoq yoshlarimizga muvaffaqiyat tilaymiz! G'olibimizni esa **tahririyatning maxsus diplom va qimmatbaho sovg'alari kutib turibdi!**

"Mushohada yuritmay turib qancha ko'p o'qisangiz, shuncha ko'p bilayotganga o'xshayverasiz, agar o'qiyotganda qanchalik ko'p mushohada yuritsangiz, shu qadar oz narsa bilishingizni aniqroq his etasiz". Fransuz yozuvchisi Volter qalamiga mansub bu bebaho fikrlar bugun ham o'z ahamiyatini yo'qotmagan. Barchaga mushohada yuritish baxti nasib etsin!

“JADIDLAR” BILIMDONI

OLTIN DAVR OG'RIQLARI

/HADE MAY YANA O'N MINGLAB TALABALAR SHU SARGUZASHTLARNI BOSH DAN KECHIRADI/



SUYUNCHI! MEN TALABA BO'LDIM!

O'zgacha quvonch! Bu voqeani qo'chqor so'yib, to'ydek nishonlashadi! Bunday baxt hammaga ham nasib etmaydi...

Sentabr. Bolakay abituriyentlik ortda qol-gani, endi shaharga borishi, qishloqdagi hayot va odamlarning gap-so'zidan qutul-gani, fa-lonchi o'qishga kiribdi, degan maqto-ovlar, or-zulari ushlayotgani, universitetda faqat besh-ga o'qishini o'ylab sarxush...

Toshkentda biron-ta tanish-bilishi yo'q. Ota-onasi uni yolg'iz Xudoga ishonib, shahar-ga kuzatadi. Oldinda olis yo'l. Aslida "Men o'qish-ga kirdim!" deb nomlangan quvonch uzoqqa bormaydi. Katta orzulariga birinchi qadamni qo'ygan bolakay turli tashvishlarga ro'baru ke-ladi.

SALOM, TOSHKENT YOXUD KVARTIRA MUAMMOSI

Endi meni hayotim o'tadi ko'chada, Zo'r ashula eshitaman erta-kechada...

Bolakay poyezddan tushishi bilan izlaydigan birinchi narsa bu, albatta, turar joy. E'l-onlar-ni qidir, bor, ko'r va "Talabaga kvar-tira yo'q" degan dag'dag'alar... Shahar markazida "kvartiralar" qimmat, noiloj chekkaroqdan 2 xonali uyning bir xonasi-da yashash sharti bilan 500 000 so'mga kelishiladi. Qarasaki, bu yerda unga o'xshaganlar ko'p. Bir xo-nada 4-5 kishi yashaydi. Ha mayli, har holda ko'cha-da qolgandan yaxshi. Ming shukr.

Ammo endi kvartirada uy egasining ming'ir-ming'irlari boshlanadi. Ko'p joylarda uyning bir xonasida oila, boshqa xonasida 3-4 talaba yashaydi. Kemaga tushganning joni bir degan-laridek, nima muammo bo'lsa, siz ham teng tu-rib berasiz. Har xil odam bor. Qozongga yaqin yur-sang, qorasi yuqadi. Agar o'sha talaba shunday qabih niyatli insonlarga o'ralashib qolsa-chi? Kirish bor, chiqish yo'q yo'llar bor, hatto nihoyasi o'lim bilan tugaydigan!

YAXSHIYAM "PROYEZDNOY" BOR!

Daryo-toshqin, suvlar-to'lqin, o'tolmayman, yor-yor,

Otim oriq, manzilimga yetolmayman, yor-yor...

Endi o'qishga qatnash muammosi. Kvartira shaharning bir chekkasida, universitet shahar

markazida. Avtobusdan metrogacha 1 soat-lik yo'l, metrodan manzilgacha yana shuncha vaqt. Nafaqat avtobus, balki metroda ham odam ko'pligidan oyoq bosishga joy yo'q. Turti-na-surtina o'zingni avtobusga urasan. Bunday vaziyatga qizlar qanday chidasharkan?

Bir necha marta avtobus eshigi qisib qoldi. Jon shirin, rosa og'riydi. Shunday paytda jahldor konduktor yoki haydovchi sizning asablar-ingizni qo'zgatish uchun yetarli. Xullas, hisoblasam, bir kun-da 4800 so'm ketadi - "proyezdnoy" olgan ma'qul.

To'g'ri, bunday muammo hammadayam-mas, biroq ko'pchilikda shunaga. Yo'l uzoq-ligidan darsga kech qolasiz, "NB"lar yig'ila bosh-laydi. Yo'ldagi asabbuzarliklar, albatta, talaba-ni fanni o'zlashtirishiga ta'sir ko'rsatmasdan qolmaydi.



BU HO'KIZMAS, DIPLOM!
HO'KIZ TOSHKENTDA O'QIYDI!

OCHLIK DAVRI

Haqiqat egiladi, bukiladi, sinmaydi.

Talaba och qolsayam, o'lmaydi!

Yana bir "global" muammo - yeyish-ichish. Ko'chada "Fast food" bilan qorin aldash kamida 20 000-25 000 so'm. Bir kunda 75 000 so'm. Voy, bir oyda 2 250 000 so'm ketaypti-ku? Yo'q, yax-shisi bir kunda bir mahal ovqatlana qolsak-chi? 750 000 so'm.

To'g'ri, bu pulga bozorlik qilib, qora qozonni bir oy qaynatish mumkin. Biroq bu ko'proq kvartiradagi vaziyatga, o'sha 4-5 kishining qar-roriga bog'liq. Gohida pul tejayman deb bo-zorlik qilasiz, kvartirangizdagilar sabab bir oy-lik oziq-ovqatingiz bir haftaga yetmaydi. Un-dan keyingi pushaymon qorin to'yg'azmaydi.



Behruzbek RAJABOV,
O'ZJOKU talabasi

Oziq-ovqatning o'ziga ancha pul ketib qoladi, bir yilga hisoblaganda bu oddiy kontrakt nar-xidan baland.

Talaba Toshkentga o'qish uchun keladi, yeb-ichish uchun emas! Biroq o'qish uchun, avtobusga ulgurmay ortidan yugurish uchun, metroda tik oyoqda suyanmasdan "ltimos suyanmangiz!" yozuvini o'qib ketishi uchun energiya kerak! Uning uchun esa ye-yish kerak. Kiyinish-chi? Kontrakt-chi? Ota-ona ho'kizni sotib kontraktni zo'rg'a to'lagan. Ularni yana azoblab, telefon qilib "Dada, sa-lom, pul tamom!" deyish... Kechirasiz, bosh-qalarni bilmadim-u, men 1 so'm ham olo-mayman.

ISHLASH YOKI O'QISH?

**Bu ho'kizmas, diplom!
Ho'kiz Toshkentda o'qiydi!**

Ota-ona o'g'li telefon qilishidan qo'rqib qolgan, endi nimani sotishini bilmaydi. Qo'y-lar ketdi, ho'kiz ketdi, tovuqlaram qolmadi. As-ta-sekin hayotning bunday qiyinchiliklariga ko'nikgan talaba uchun o'qish keyingi o'rin-ga tushib qoladi. O'qish uchun deyarli vaqt bo'lmaydi. Eplab diplomni olsa bo'ldi. Ish iz-la-sak-chi?

- 2-3 yillik ish tajribasi kerak!
- O'qishni bitirmagansiz, diplom kerak!
- 3-kurs bo'lganingizda keling!
- Talabaga ish yo'q!
- Ish yo'q!
- Yo'q!..

Xullas, ish yo'q. Ha may-li, kunlik ishlar bor-ku! Bo-zor bor! Biroq hozir o'qish, o'rganish kerak bo'lgan davrda talaba arava su-rib, birovning xizmatini qilib yursa, kelajak qanday bo'ladi?

UNIVERSAL BAKALAVR DIPLOMI

**Diplom oddiy qog'oz emas,
Diplom - karton qog'oz!**

Ishga, pul topishga berilib ketgan tala-baning universitetdagi ishlari "5" bo'lmay-di. U doim gap eshitadi, kechga qolib keladi, darsda uxlaydi, vazifalarni tayyorlamay ke-ladi, uyalib qoladi. "5" ga o'qiyman, deb kel-gan talaba ustozlarning "3" qo'yib berishiga zor ahvolda qoladi. Universitetni tugatganda esa ofitsiantlik, ta'mirlash, tuzatish, arava su-rish, yuk ortish, g'isht terish va boshqa men esimdan chiqargan sohalar bo'yicha univer-sal bakalavr diplomiga ega bo'ladi. Kelajak-da "tankasi" bo'lmasa, sohasi bo'yicha ishga kirolmaydi, chunki u o'qish o'rniga pul topish bilan band bo'lgan. Axir saviyasiz va bilimsiz kadr kimga kerak? Xullas, eng oxirida zo'r dip-lom yaratiladi, zo'r kadr emas.

“BIZNING YOSH IJODKORLAR”

Loyiha muallifi: **Shahribonu RAHMATOVA.**

"Singlim portreti"



"Xivalik qiz"

Etibor berganmisiz, yosh ijodkorlarning ismi yonida "umidli" so'zi qo'llaniladi. Sababi yoshlar har bir sohaning er-tasi, bunyodkori, ya'ni umidi sanaladi. Shunday ijodkorlarimizdan biri Kamoliddin Behzod nomidagi Milliy rassomlik va dizayn instituti dastgohli rangtasvir yo'nalishi talabasi **Farrux Mamadiyrov**.

U o'zbek milliy tasviriy san'atining rangtasvir yo'nalishida samarali ijod qilib kelmoqda. **19 yoshida "Taassurot" nomli ilk shaxsiy ko'rgazmasini tashkil qilgan.** Tasviriy san'at yo'nalishida bir qator respublika va xalqaro tanlov hamda festivallarda ishtirok etib, g'olib va sovrindorlar qatoridan o'rin olgan.



Natyurmort



"Ijodiy lahza" kompozitsiyasi



"Intiqom" kompozitsiyasi

Farrux chizgan suratlarini tomosha qilar ekansiz, ranglar, detallar uyg'unligi o'ziga rom qilib qo'yadi, soatlab kuzatsangiz ham yonidan ketgingiz kelmaydi. Rassom o'zining **eng sevimli asarlaridan biri "Xivalik qiz"** surati haqida shunday deydi:

– Xorazmshohlar davlati tarixi bu asarni yaratishda ilhom bergan. Xiva shahrining butun go'zalligini bir asarda jamlashga harakat qildim.

Suratda subhidam vaqti shahar chiroyidan sarmast turgan Xorazm qizi tasvirlangan. Bu asar ijodkorga omad va yutuqlar olib kelgan. **Shanxay hamkorlik tashkiloti tomonidan o'tkazilgan "Jahon merosi o'zbekistonlik yosh ijodkorlar nigohida" mavzusidagi ijodiy asarlar tanlovida Gran-pri sohibi bo'lgan.** Hozir "Xivalik qiz" jahon ko'rgazmalari fondidan o'rin olgan.

YOSHLAR OVOZI

Bosh muharrir:
Hamza ABDULLAYEV

Muassis:
O'zbekiston yoshlar ittifoqi
Markaziy Kengashi

Bosh hamkor:
O'zbekiston Respublikasi
Yoshlar ishlari agentligi

Navbatchi muharrir:
Sardor SA'DULLAYEV

Musahhihlar:
Rashid XO'JAMOV,
Qirmizoy HAKIMOVA

Gazeta O'zbekiston Respublikasi Prezidenti Administratsiyasi huzuridagi Axborot va ahamiyat kommunikatsiyalar agentligida 2020-yil 11-dekabrda № 0242 raqami bilan qayta ro'yxatdan o'tgan. Gazeta materiallari tahririyat kompyuter markazida tenidi va sahifalandi. Tahririyat manzili: 100083, Toshkent, Matbuatchilar ko'chasi, 32. Telefonlar: (7) 239-22-16, (7) 236-76-95.

"Sharaq" nashriyat-matbaa aksiyadorlik kompaniyasi bosma-xonasida, A-3 formatda chop etiladi. Hajmi – 2 bosma tabaq. Korxonalar manzili: Buyuk Turon ko'chasi, 41. Indekslar: 203, 3203. Bahosi kelishilgan narxda. Buyurtma G-855, Adadi – 10527. Bosishga topshirish vaqti – 21.00. Topshirildi – 20.00.

Saytimgiza o'tish uchun QR-kodni telefoningiz orqali skaner qiling.



123456